

OTVORENA JAVNA RASPRAVA

Reforma Institucije ombudsmana BiH

Izmjenama i dopunama postojećeg, odnosno novim Zakonom o ombudsmanu za ljudska prava BiH trebao bi se osigurati viši stepen neovisnosti ove institucije i unaprijediti njena efektivnost u obavljanju mandata zaštite i promoviranja ljudskih prava, te omogućiti jače prisustvo institucije na terenu, uz preciznije definiranje njene unutarnje strukture. Istaknuli su to sudionici javne diskusije/debate o ulozi Institucije ombudsmana BiH i neophodnim reformama u toj oblasti, upriličene jučer u Sarajevu u organizaciji Inicijative za monitoring evropskih integracija BiH, javlja Fena.

Polazište za diskusiju bio je radni materijal, sačinjen u skladu s jedinstvenim pravilima koje je usvojila Parlamentarna skupština BiH i preporukama Međunarodnog koordinacijskog komiteta koji insistira na finansijskoj neovisnosti Institucije ombudsmana BiH, transparentnosti i pluralizmu u izboru ombudsmana, te jačanju saradnje s civilnim društvom. Kako je novinarka kazala ombudsman BiH Jasminka Džumhur, jedan od elemenata koji bi trebalo inkorporirati u novi zakon-



ski tekst jeste i mišljenje Venecijanske komisije, uključujući i nove mandate Institucije ombudsmana BiH. Pojasnila je da bi se na taj način sublimiralo stanovište da su Ombudsmani BiH centralna institucija za slobodu pristupa informacijama i centralna antidiskriminacijska institucija u kontekstu primjene Zakona o zabrani diskriminacije.

Zastupnik u ZD-u PSBiH Nikola Lovrinović kazao je da bi novim zakonskim rješenjima trebali biti preciznije definirani provedba preporuka Institucije ombudsmana BiH i način njihovog djelovanja u oblasti zaštite ljudskih prava, odnosno komuniciranja s institucijama vlasti. Izrazio je uvjerenje da bi se prijedlog zakona do kraja godine mogao naći u parlamentarnoj proceduri.